

* * *

Ինչքան էլ խաբէք, աղջիկներ սիրուն,
 Իմ խաբուած սիրտը սիրում է այնքան,
 Կեանքում ծաղիկն է մի անգամ սիրում,
 Խղճուկ ծաղկունքն են սիրում մի անգամ,
 Քանզի ապրում են հազիւ մի դարուն,
 Ես ձեզ սիրում եմ՝ ինչքան էլ փախէք,
 Ես միշտ զարկերակ, սէրը՝ միշտ արիւն,
 Զեղնից կը փախչեմ, որ ինձ ետ կանչէք,
 Որպէս ձիւներից դուրս ցայտող դարուն:

* * *

Ի՞նչ ունես փրշոտ,
 Մութ թրփերի տակ,
 Ես քեզ եմ կարօտ,
 Իմ հեզ մանուշակ:

Դու կը թառամես՝
 Ընկած գրկէ-գրկի,
 Լոկ ինձ կը վառես,
 Մէկ էլ քեզ լըռիկ:

Դրսում ի՞նչ ունես,
 Խաբուող մանուշակ,
 Ե՞րբ պիտի բուրես
 Իմ թեւերի տակ...

* * *

Երբ սուլից մանուկ իմ սիրտն էր ցաւում՝
 Մի ծով կարօտից՝ մի կաթիլ հացի,
 Ինձ բանտի մըռայլ պարիսպ էր թըւում
 Սարերի բարձր շղթան ղիմացի:

Եւ հիմա երբ որ ինձ կինն է դաւում,
 Պոկում էք երգիս թեւերն առնացի՝
 Երկինքն ինձ բանտի տանիք է թըւում,—
 Լուսինն՝ ինձ խաբող դէմքը կանացի...